

## **TESTAMENTO DI ANNA SEDDA** **(2 Giugno 1688)**

Die 2 de su mese de lampadas de 1688 Mamuyada.

In nomen de Deu, nostru Sennore Iesu Cristu, et de totu sa Corte Celestiale siat à totus notoriu de comente Anna Sedda de Bonifaciu de sa presente Villa acatendesi in domo sua et habitassione solita in su letu detenta de infirmitade corporale de sa qui intendet passare de custa à sa de mengius vida, sigunde este dispostu (omnibus hominibus semel) pro tantu istande in su intendimentu sou et firma loquela faguet su presente testamentu de su modu siguiete.

Et primo intregat sa anima sua à Deus, qui la tenet criada et su corpus a sa terra de sa qui istait formadu.

Item faguet et criat curadores de sa anima sua à sas caras figias suas Juannangela et Francisca et juntamente à su generu suo Franciscu Mameli et à sa nura sua Grassia Mula pro qui cuddos si la dispensen segun den poder et querrer et de issos confiat.

Item lassat et cumandat si diat à Francisca cara figia sua totu cuddu pennente qui hoe issa testadora istat habitande pro li haver servidu bene comente à figia bona et de obediensia et pro esser gasi sa voluntade sua et queret et cumandat qui nessunu li fetat contradissione.

Item lassat et confirmat à sa cara nura sua Grassia Mula totu cudda parte de vingia, qui tenet in su oru de Vidda in '*sa de Nestasia*', juntamente cum unu pennente, qui tenet in su tringuingu de '*sa Vena*', qui este in hue istat Franciscu Mameli, et queret et cumandat qui nessunu li fetat contradissione pro esser gasi sa voluntade sua.

Item lassat à Juanna Angela atera figia sua totu cuddu pennente mannu, qui sa dita Juanna Angela habitat, in '*su bighinadu de sa Vena*', juntamente cum totu totu cuddu cantu de terra, qui tenet in logu naradu 'Nurague Muclu' et queret et cumandat nessunu li fetat contradissione pro esser gasi sa voluntade sua. Item lassat à sa figia sua de issa testadora nominada Francisca totu sas cositas, qui hoe tenet in domo sua et nessunu li fetat contradissione pro esser gasu sa voluntade sua.

Item declarat issa testadora, qui supra sa vingia de '*Mugianu*' devet unu censale a '*sa capella de Nostra sennora de su Rosariu*', et pro cantu passesit su fogu et prusiessit cudda possessione, pro tantu, queret et cumandat qui si anadat à su ditu depidu totu cuddu cantu de terra qui issa testadora tenet in logu nadu '*Su truncone*' pro esser gasi sa voluntade sua.

Item queret issa testadora qui sos figios de su quondam figiu suo et pro issos sa nura sua Grasia Mula tengiat sa supradita parte de vingia de '*sa de Nastasia*', cum su pennente supra mensionadu, cum custu inperò, qui paguet sa parte de su depidu.

Item faguet hereos suos universales de sos depius benes suos à sas caras figias suas supra mensionadas, et nura sua pro qui cuddos si los dividan in iguales partes pro esser gasi sa voluntade sua, et queret qui custu testamentu siat validu, si no per vias de testamentu, per vias de codiciliu o de su mengius modu potat valer et revocat cum custu quale si quergiat ateru testamentu apat factu in podere de quale si quergiat notariu, iscrivanu o preide; custa est sa voluntade sua valida et inrevocabile; quale testamentu este istadu lectu à issa testadora dae sa prima rigra finsa sa ultima, et de cuddu no revocat cosa, quale este istadu lectu sende in su intendimentu sanu in presensia pro testimongios mossen Quirigu Querenty y Pera Moro Sedda de sa presente Villa, et istande sos ditos testimongios presentes issa testadora disponet su siguiete.

Item a sa matessi hora cumandat issa testadora qui a sa figia sua Juanna Angela se li diat totu cuddu cantu de terra aratoria qui issa testadora tenet in '*Su coddu de su logu*' à pius de sas cosas supra mensionadas pro esser gasi sa voluntade sua.

Item declarat issa testadora qui su quondam figiu suo Salvatore rescatesit duos cantos de terra, qui sun su unu in logu nadu '*Sa vadde de su porcu*' et su ateru '*in hue crepat sa abba*' saltos de sa presente Villa, et queret et cumandat issa testadora qui semper et quando sos de pius figios quergian dare su qui su ditu quondam figiu suo appat gastadu qui si dividat in iguales partes et si no qui resten pro sos figios de su quondam Salvatore figiu de issa testadora.

Custa es sa voluntade sua segundu lu confirmat deinnantis de sos supraditos testimongios, et firmat su ditu Querenty, die et annu ut supra.

Notaio Gavino Casula.

da *Mamoiada, il racconto del tempo*, di Giacomino Zirottu –  
ed. Solinas–Ollsys computer 2004 –

**Giacomino Zirottu** - Docente di lettere nei Licei per 30 anni si è dedicato alla ricerca sulla storia locale della Sardegna. Le sue tante opere sono state pubblicate nei periodi dal 1996 al 2004.

(Vi sono imprecisioni nei toponimi, ma sono tutti esistenti nel territorio di Mamoiada)

Come eravamo -- [www.mamoiada.org](http://www.mamoiada.org)